

Tuesday, February 17, 2026

Time - 2:30pm - 2:35pm

**AKASHVANI AIZAWL
REGIONAL NEWS UNIT**

**REGIONAL NEWS BULLETIN
(MIDDAY)**



ASSEMBLY

Mizoram Legislative Assembly vawi 9-na Budget Session chu vawiin chawhma dar 10:30 khan Speaker Pu Lalbiakzama kaihhruaia tan a ni.

Session tan ni ah hian Larsap Gen. Vijay Kumar Singh chuan thusawiin, ram hruaitu thiam tak te kaihhruaina hnuaiah Mizoram chu remna leh muanna awmna hmun a ni chhonzawm zel tih sawiin harsatna tam tak karah ei leh bar zawna kawngah huapzo takin hmasawna hmuh zel a ni chu lawmawm a tih thu a sawi a, hmathlir fiah tak leh theihtawp chhuahna chuan engtikah emaw chuan Mizoram chu remna leh hmasawna state entawntlak takah a la siam ngei a beisei thu leh mi naran ten an suangtuahna a tak rama an chantir theih tih lantirtu a nih ngei a beisei thu a sawi a ni.

Larsap chuan a kaihhruai sorkar inrelbawlna chuan kawng tin rengah hna thawk tha, langtlang leh mawhphurhna la ngam ni turin theihtawp an chhuah a ti a, a kaihhruai sorkar tum ber chu lo lama eizawna, hmasawna ruhrel din leh kawng hrang hrang hmangin mahni a innghat state siam a ni tih sawiin mau leh tualchhunga hmanraw awm te hman tangkai a tum a ti a, Mizoram thalaite tana kutkawih eizawna programme leh infiamna bakah an thiamna tih hmasawn sak te chu an ngaihpawimawh zual zingah a tel tih a ti a, tunhma atanga House ah nungchang mawi leh zahawm tak hmanga sawihona chhuanawm tak an lo neih tawh thin chu member ten an chhawmnun zel a beisei thu a sawi bawk a ni.

March ni 16 thleng awn tur Mizoram Legislative Assembly 9-na thutkhawm vawi 6-na session-ah hian nimin tlai dar 3 thleng khan House chhunga chhan chi zawhna (starred question) 1,223 a lut tawh a, ziaka chhan chi (un-starred question) 407 a lut tawh a, dan siam danglam tura rawna (amendment bill) pathum leh bill pangngai pakhat a lut tawh a. Tun thla ni 26-ah kum 2026-2027 Mizoram budget chu Finance enkawltu chief minister Pu Lalduhoma'n a pharh ang.

Nimin tlai thlenga bill lut tawhte chu - Law & Judicial department atangin bill pahnih - 'The Mizo Marriage Divorce Inheritance of Property (Amendment) Bill, 2026' leh The Mizoram Jan Vishwas (Amendment of Provisions) Bill, 2026 te, Finance department atangin 'The Mizoram Goods and Services Tax (First Amendment) Bill, 2026' te, Land Revenue & Settlement department atangin 'The Mizoram (Prevention of Public Land Encroachment) Bill, 2026' te a ni a; MLA 10 hnen atangin resolution 5 theuh a lut tawh a, resolution hi a vaiin 50 a lut tawh a ni.

(Corr: Maremi)



GOVERNOR : ASSEMBLY

Larsap General VK Singh-a'n CM's Special Package chu a dawngtu an tam zawk theih nan cheng sing 5-ah tihhniam a nih thu a sawi.

He thu hi vawiina Mizoram Legislative Assembly vawi 9-na thutkhawm vawi 6-na session a hawnaah sawiin, Larsap chuan a kaihhruai sorkar hmalakna hnuaiia sum leh pai, technical, infrastructure leh institution hmanga Mizoram mipuite thuamchakna tur Mizoram Bana Kaih Hand Holding Scheme chu a thawh hnihna kalpui a ni leh tawh a ti a, he scheme hnuaiiah hian Progress Partner engemawzat te hnenah loan pek tawh niin, Chief Minister's Special Package Grant hnuaiiah fund pek chhuah a ni tawh bawk a ti a, CM's Special Package chu a dawngtu an tam zawk theih nan cheng sing 5-ah tihhniam a nih thu a sawi bawk a ni.

Hei bakah hian Larsap chuan hmasawna daih rei leh tluantling a awm theih na turin Chief Minister's Bana Kaih Innovation Challenge din a ni bawk yhu sawiin, he hmalakna in a tum ber chu inthlak danglamna hmuh theih leh hmuh theih loh thlen tir chung a Mizoram chhunga district, block leh khaw hrang hranga hmasawna hnathawhte inzawmkhawm tir a ni a ti a. Kum 2025-26 chhung khan Mizorama damdawilama inenkawl na chu nasa taka tihchak a ni tih sawiin, hemi hun chhung hian Sub-centre 17 sak zawh a ni a, NEC puihna hnuaiiah Mizoram State Cancer Institute CT Simulator chu hman theih a dah a ni a, Mizoram Universal Health Care Scheme chu ICU, private cabin, O&G OTs, leh general ward hmang te in tihchangtlun a ni a, PG medical seat 10 hawn phalna an dawn bakah damdawi in khum (private bed) 30 leh ICU khum 13 hawn a ni bawk a ti a. Larsap chuan Mizoram State Health Care Society chuan state chhung leh pawna sorkar leh mimal damdawi inah te cashless hmanga inenkawl theihna a siam tih asawiin, nikum 2025 November thla thleng khan Mizoram pawnah damlo 804 leh Mizoram chhungah damlo sing 4, sang 8, 761 te hnenah cheng vaibelchhe 78.9 hu cashless hmanga enkawl na hi pek a ni a, chung zingah chuan PM-JAY hmangtu mi sing 3, sang 1,726 an tel tih a sawi bawk a ni.



MPCC PROTEST

MPCC thalai vawiina Vanapa Hall kawta pungkhawm chuan ZPM sorkar chu Electric Bill tisang lo tura an intiamna bawhchhia ah puhin Electric bill an tisang chu mipui te zahlohna leh palzutna ani tih an sawi.

Mizoram Pradesh Yout Congrees Committee chuan vawiin khan Vanapa Hall kawtah Electric Bill sang avanga mipui thlavang hauhna punkhawm huaihawtin electric bill sang tak xerox copy chu an duhlohna lantir nan Vanapa Hall kawtah an hal a ni.

MPCC Senior Vice President Pu Ngurdingpuia Pachhuau chuan nikum kum tawp lam atanga ZPM sorkarna hnuaiia uchuak taka electric bill sang avangin mipui te thlavang hauh nan punkhawm an huaihawt a ti a, mipuite eng chhit leh bill chawi a inmil loh nasat avangin chhungkaw tam tak an buai phah tih sawiin ZPM sawrkar chuan mipuite ah chhiah lak dan ringawt a zawng a ti a, sawrkarna an chan hmaa an intiamna bawhchhia ah puhin electric bill sang chu mipuite zah lohna leh palzutna ah an ngaih thu a sawi.

MPCC pungkhawm chuan mipui harsatna sutkian niloa Mizoram Rohlu hralh ani zel chu pawl antih thu sawiin, Tuirial hydel Project pawh hralh tuma hmalak mek ani an ti a, Mizoram rohlu leh hmun pawimawh hralh chu MPCC in an dodal zel dawn tih an sawi bawk.

(Hruaia Aizawl PTC)



SIAHA NCORD

Siaha District Narco Coordination (NCORD) chuan vawiin khan District Bawrhsap leh NCORD chairman Pu VL Hruaizela Khiangte hovin DC Mini Conference Hall ah ruihlo leh a kaihawih chungchanga kum 3 chhunga hmalak dan tur rel in an thukhawm.

He hunah hian Addl SP Pu Beimosia Lapi chuan 'Three Years District Level Action Plan to Combat Drug 2026-2029' tur an duan chungchang sawiin - Supply tihtlem, Demand tihtlem leh atuartu (Harm) tih tlem na kawnga hmalak tum a ni thu sawiin, a mawhphurtute chu thawhho leh tanrua a pawimawh thu a sawi bawk.

Supply Reduction, Demand Reduction leh Harm Reduction hnuaia hmalak tum dan hrang hrang chu thirho niin belh ngai lai te sawi ho a ni a, belh tur nei member te chuan hmachhawp chu Member Secretary Pu Beimosia Lapi hnena ziaka thelul leh tura rel a ni.

(CZ Hluna PTC Siaha)

